

mia: dicho mia, perchè havia gran fantasia a questo, et za la missi sollo et la persi. Et sier Polo Barbo, sier Alvise da Molin, savij dil conseio, sier Beneto Zustignan, sier Piero Capello, savij a terra ferma, messeno a l'incontro indusiar di armar ditto capetanio, metti bancho fino sia expedi di armar le galie grosse. Andò le parte: 0 non sincere, 2 di no, 66 di consieri, et la nostra have 91. Et fu presa con gran honor nostro.

Rimase conseio di X con zonta di colegio, procuratori. Et questi fono chiamadi; *tamen* non so certo si se reducesseno.

Questi sono li X savij a tansar, fono electi in questo pregadi, oltra altri 5 vi sono, *videlicet*: sier Francesco Trum, sier Nicolò Dandolo, sier Piero Loredam, sier Piero Duodo e sier Zanoto Querini. Or rimaseno questi altri, *excepto* sier Marin di Garzoni, fo podestà a Padoa, *videlicet*: sier Francesco Mocenigo, fo capetanio a Brexa, sier Lorenzo di Prioli, fo avogador, sier Zuan Marcellò, fo governador, sier Marin Contarini, fo governador, sier Christofal Moro, fo podestà e capetanio a Ravena, sier Piero Malipiero, fo podestà e capetanio a Treviso, sier Beneto Sanudo, fo consolo a Damasco, sier Marco Venier, fo patrom a l'arsenal, et sier Matio Donado, che fo di pregadi.

*Scurtinio di orator in Franza.*

Sier Francesco Querini, fo retor e provedador a Cataro, <i>quondam</i> sier Andrea . . . . .	65
Sier Zorzi Emo, savio a terra ferma, <i>quondam</i> sier Zuan, el cavalier . . . . .	90
Sier Andrea Trivixan, el cavalier, fo ambador in Ingaltera . . . . .	42
Sier Francesco Foscarini, el cavalier, fo ambador al re di romani . . . . .	79
Sier Marco Lippomano, el cavalier, fo ambador a Milam . . . . .	53
Sier Nicolò Bernardo, <i>quondam</i> sier Piero, da Sam Pollo . . . . .	41
Sier Nicolò Michiel, el dotor, è ai X officij . . . . .	26
Restò † sier Polo Pisani, el cavalier, fo avogador di comun . . . . .	119
Sier Vètor Foscarini, camerlengo di comun, <i>quondam</i> sier Alvise, provedador . . . . .	39
Sier Marco Dandolo, dotor, cavalier, fo ambador a Milam . . . . .	76
Sier Hironimo Foscarini, è a le raxom nuove, <i>quondam</i> sier Alvise, provedador . . . . .	37
Sier Antonio Zustignan, el dotor, fo provedador sopra le camere . . . . .	53

*A di 21 zugno.* In colegio vene l'orator dil papa, *videlicet* el vescovo di Chai, et mandati li altri fuora per li cai di X, *licet* fusse parte di pregadi, ma per dar reputatiom. Et sier Lucha Zen, el consier, non voleva ussissemo; *tamen* el doxe volsse. Or li fo leto et ditto la diliberatiom nostra fata im pregadi.

Vene l'orator di Franza, al qual foli ditto la cosa seguita a Ampho, di milanesi fuziti, et quel retenuto a Mestre; et fo mandati tutti fuora. Et quello disse non lo so.

Fo ballotato far uno presente di ducati 25 a lo legato dil papa va in Hongaria, qual si parte doman, va a Segna.

Vene sier Nicolò Dolfim, fo synicho, aldito in contraditorio con sier Alvise Loredam, fo governador a Monopoli, per lui intromesso; et li ha dà capitoli, qual dimandava termine a mandar a examinar testimonij; et il Dolfim lo volle menar. Et mandati tutti fuora, il colegio sentiva contra dil Loredam, *excepto* sier Zorzi Emo, che lo favorizava. Et foli ditto venisseno marti, se li diria il tutto.

Vene sier Hironimo Lippomano, fo dal bancho, 154\* con una suplication *etc.* Et sier Piero Morexini, l'avogador, li parlò contra gaiardamente. Fo rimesso a doman, fazi intervenir li cai di creditori.

In questa matina non fo niuna letera, *quod est mirum*; et da poi disnar fo gram conseio.

*A di 22 zugno.* In colegio vene l'orator di Franza, et volse fusseno mandati tutti fuora; et con li capi di X comunichò alcune cosse. Et, chome intisi, fo ditto missier Zuam Giacomo Triulzi era stà confinato im Picardia, et tolloli Vegevene; et *tamen* non fu vero.

Et il principe poi si partì di colegio, et rimase la Signoria e li savij. Aldito Giacomo da Molla, secretario dil conte di Pitiano, per una letera del conte, qual fo leta, par vogli tre page, computà la mexata. Or, sier Baldisera Trivixan, el consier, vice dose, li disse *aperte*, averli scritto cavalchi, e aspetano la risposta.

*Di Brandizo, di 1, 3 et 4, di sier Giacomo Liom, governador.* Zercha la galia si arma, lauda il sora-comito; scrive mal di Urbam Carazolo, la qual galia è armata, e anderà via; danna il scrivam di l'armamento, che fo prima a Trani cha li. *Item*, Antonio di Fabri, andava a Corfù, mandò a dimandar ajuto, et lui ordinò la galia di Monopoli andasse in conserva con lui a Corfù. *Item*, capitò li una letera di 29, da Leze, di sier Francesco Malipiero, consolo. Avisa, do oratori, uno dil re Felrico, l'al-